

永樂北藏

趙樸初題



图书在版编目 (CIP) 数据

永乐北藏/赵朴初名誉主编. -北京: 线装书局, 2000. 2
ISBN 7-80106-052-0

I. 永… I. 赵… II. 大藏经 N. B941

中国版本图书馆 CIP 数据核字 (1999) 第 73752 号

永樂北藏 (二〇〇冊)

出版發行

綫裝書局

(北京朝陽區春秀路太平莊十號)

責任編輯

李立

裝幀設計

顏菲菲

印 刷

中國地質科學院五六二印刷廠

版 次

二〇〇〇年三月第一版第一次印刷

印 數

〇〇一——一〇〇

書 號

ISBN 7-80106-052-0/B·1

定 價

八八〇〇〇 圓

ISBN 7-80106-052-0



9 787801 060525 >

御製

天清地寧
風雨調均
烽警不作
化醇俗厚
外順內安
普際光明
大正統五
年十一月
十
陰陽和順
百穀常豐
禮教興行
人皆慈善
一統熙皞
既往未來
俱登正覺
七政明朗
萬類咸暢
子孝臣忠
物靡害災
九幽六道
俱登正覺

永樂北藏第九三冊目錄

○大智度論 續前 (本冊卷第二十七至卷第五十八 入七—儀八) 一

大智度論卷第二十七

入七

龍樹菩薩造

姚秦三藏法師鳩摩羅什譯

釋初品中大慈大悲

經大慈大悲當習行般若波羅蜜

入七

論大慈大悲者四無量心中已分別今當更略說大慈與一切衆生樂大悲拔一切衆生苦大慈以喜樂因緣與衆生大悲以離苦因緣與衆生譬如有人諸子繫在牢獄當受大辟其父慈惻以若干方便令得免苦是大悲

得離苦已以五所欲給與諸子是大慈如是等種種差別問曰大慈大悲如是何等是小慈小悲因此小而名爲大答曰四無量心中慈悲名爲小此中十八不共法次第說大慈悲名爲大復次諸佛心中慈悲名爲大餘人心中名爲小問曰若爾者何以言菩薩行大慈大悲答曰菩薩大慈者於佛爲小於二乘爲大此是假名爲大佛大慈大悲真實最大復次小慈但心念與衆生樂實無樂事小悲名觀衆生種種身苦心苦憐愍而已不能令

脫大慈者念令衆生得樂亦與樂事大悲憐愍衆生苦亦能令脫苦復次凡夫人聲聞辟支佛菩薩慈悲名爲小諸佛慈悲乃名爲大復次大慈從大人心中生十力四無所畏四無礙智十八不共法大法中出能破三惡道大苦能與三種大樂天樂人樂涅槃樂復次是大慈遍滿十方三世衆生乃至蜚蟲慈徹骨髓心不捨離三千大千世界衆生墮三惡道若人一一皆代受其苦得脫苦已以五所欲樂禪定樂世間最上樂自恣與之皆令滿

足比佛慈悲千萬分中不及一分何以故世間樂欺誑不實不離生死故問曰法在佛心中一切皆大何以故但說慈悲爲大答曰佛所有功德法應皆大故問曰若爾者何以但說慈悲爲大答曰慈悲是佛道之根本所以者何菩薩見衆生老病死苦身苦心苦今世後世苦等諸苦所惱生大慈悲救如是苦然後發心求阿耨多羅三藐三菩提亦以大慈悲力故於無量阿僧祇世生死中心不歇沒以大慈悲力故久應得涅槃而不取證以是

故一切諸佛法中慈悲爲大若無大慈大悲
便早入涅槃復次得佛道時成就無量甚深
禪定解脫諸三昧生清淨樂棄捨不受入聚
落城邑中種種譬喻因緣說法變現其身無
量音聲將迎一切忍諸衆生罵詈誹謗乃至
自作妓樂皆是大慈大悲力復次大慈大悲
大名非佛所作衆生名之譬如師子大力不
自言力大皆是衆獸名之衆生聞佛種種妙
法知佛爲祐利衆生故於無量阿僧祇劫難
行能行衆生聞見是事而名此法爲大慈大

悲譬如一人有二親友以罪事因緣故繫之
囹圄一人供給所須一人代死衆人言能代
死者是爲大慈悲佛亦如是世世爲一切衆
生故以頭目髓腦布施盡爲一切衆生一切
衆生聞見是事即共名之爲大慈大悲如尸
鞞王爲救鴿故盡以身肉代之猶不與鴿等
復以手攀秤欲以身代之是時地爲六種震
動海水波盪諸天香華供養於王衆生稱言
爲一小鳥所感乃爾真是大慈大悲佛因衆
生所名故言大慈大悲如是等無量本生經

中悉應廣說問曰禪定等諸餘功德人不知故不名爲大智慧說法等能令人得道何以不稱言大答曰佛智慧所能無有遍知者大慈大悲故世世不惜身命捨禪定樂救護衆生人皆知之於佛智慧可比類知不能了了知慈悲心眼見耳聞處處變化大師子吼云故可知復次佛智慧細妙諸菩薩舍利弗等尚不能知何況餘人慈悲相可眼見耳聞故人能信受智慧深妙不可測知復次是大慈大悲一切衆生所愛樂譬如美藥人所樂服

智慧如服苦藥人多不樂人多樂故稱慈悲爲大復次智慧者得道人乃能信受大慈悲相一切雜類皆能生信如見像若聞說皆能信受多所饒益故名爲大慈大悲復次大智慧名捨相遠離相大慈悲爲憐愍利益相是憐愍利益法一切衆生所愛樂以是故名爲大是大慈大悲如持心經中說大慈大悲有三十二種於衆生中行是大慈大悲攝相緣如四無量心說復次佛大慈悲等功德不應一切如迦旃延法中分別求其相上諸論議

師雖用迦旃延法分別顯示不應盡信受所以者何迦旃延說大慈悲一切智慧是有漏法繫法世間法是事不爾何以故大慈悲名爲一切佛法之根本云何言是有漏法繫法世間法問曰大慈悲雖是佛法根本故是有漏如淤泥中生蓮華不得言泥亦應妙大慈悲亦如是雖是佛法根本不應是無漏答曰菩薩未得佛時大慈悲若言有漏其失猶可今佛得無礙解脫智故一切諸法皆清淨一切煩惱及習盡聲聞辟支佛不得無礙解脫

八七

有煩惱習不盡處處中疑不斷故心應有漏諸佛無是事何以故說佛大慈悲應是有漏問曰我不敢不敬佛以慈悲心爲衆生故生應是有漏答曰諸佛力勢不可思議諸聲聞辟支佛不能離衆生想而生慈悲諸佛能離衆生想而生慈悲所以者何如諸阿羅漢辟支佛十方衆生相不可得而取衆生相生慈悲今諸佛十方求衆生不可得亦不取衆生相而能生慈悲如無盡意經中說有二種慈悲衆生緣法緣無緣復次一切衆生中唯佛

盡行不誑法若佛於衆生中取相而行慈悲心不名行不誑法何以故衆生畢竟不可得故聲聞辟支佛不名為盡行不誑法故聲聞辟支佛於衆生於法若取相若不取相不應難不悉行不誑法故一切智能斷一切諸漏入七能從一切有漏法中出能作無漏五因緣是法云何自是有漏問曰無漏智各各有所緣無有能悉緣一切法者唯有世俗智能緣一切法以是故說一切智是有漏相答曰汝法中有是說非佛法中所說如人自持斗入市不

與官斗相應無人用者汝亦如是用汝法不與佛法相應無人用者無漏智慧何以故不能緣一切法有漏智是假名虛誑勢力少故不應真實緣一切法汝法中自說能緣一切法復次是聲聞法中十智摩訶衍法中有十一智名為如實智是十智入是如實智中都為一智所謂無漏智如十方水入大海水中都為一味是大慈大悲佛三昧王三昧師子遊戲三昧所攝如是略說大慈大悲義

經菩薩摩訶薩欲得道慧當習行般若波羅

蜜菩薩摩訶薩欲以道慧具足道種慧當習行般若波羅蜜

論道名一道一向趣涅槃於善法中一心不放逸道隨身心念道復有二道惡道善道世間道出世間道定道慧道有漏道無漏道見道修道學道無學道信行道法行道向道果道無礙道解脫道信解道見得道慧解脫道俱解脫道如是無量二道間復有三道地獄道畜生道餓鬼道三種地獄熱地獄寒地獄黑闇地獄三種畜生道地行水行空行三種

鬼道餓鬼食不淨鬼神鬼三種善道人道天道涅槃道人有三種作罪者作福者求涅槃者復有三種人受欲行惡者受欲不行惡者不受欲不行惡者天有三種欲天色天無色天涅槃道有三種聲聞道辟支佛道佛道聲聞道有三種學道無學道非學非無學道辟支佛道亦如是佛道有三種波羅蜜道方便道淨世界道佛復有三道初發意道行諸善道成就衆生道復有三道戒道定道慧道如是等無量三道門復有四種道凡夫道聲聞

八七

六

道辟支佛道佛道復有四種道聲聞道辟支
佛道菩薩道佛道聲聞道有四種苦道集道
滅道道復有四沙門果道復有四種道觀
身實相道觀受心法實相道復有四種道爲
斷未生惡不善令不生道爲斷生惡令疾滅
道爲未生善法令生道爲已生善法令增長
道復有四種道欲增上道精進增上道心增
上道慧增上道復有四聖種道不擇衣食卧
具醫藥樂斷苦修定復有四行道苦難道苦
易道樂難道樂易道復有四修道一爲今世

樂修道二生死智修道三爲漏盡故修道四
分別慧修道復有四天道所謂四禪復有四
種道天道梵道聖道佛道如是等無量四道
門復有五種道地獄道畜生餓鬼人天道復
有五無學衆道無學戒衆道乃至無學解脫
知見衆道復有五種淨居天道復有五欲天
道復有五如法語道復有五非法語道復有
五道凡夫道聲聞道辟支佛道菩薩道佛道
復有五道分別色法道分別心法道分別心
數道分別心不相應行道分別無爲法道復

有五種道苦諦所斷道集諦所斷道滅諦所斷道道諦所斷道思惟所斷道如是等無量五法道門復有六種道地獄道畜生餓鬼人天阿修羅道復有捨六塵道復有六和合舊云六神通道六種阿羅漢道六地修道六定道六波羅蜜道一一波羅蜜各各有六道如是等無量六道門復有七道七覺意道七地無漏道七想定道七淨道七善人道七財富道七法福道七助定道如是等無量七道門復有八道八正道八解脫道八背捨道如

是等無量八道門復有九道九次第道九地無漏道九見斷道九阿羅漢道九菩薩道所謂六波羅蜜方便成就衆生淨佛世界如是等無量九道門復有十道所謂十無學道十想道十智道十一切處道十不善道十善道乃至一百六十二道如是等無量道門知是諸道盡知通知是爲道種慧問曰般若波羅蜜是菩薩第一道一相所謂無相何以說是種種道答曰是道皆入一道中所謂諸法實相初學有種種別後皆同一無有差別譬如

劫盡燒時一切所有皆同虛空復次為引導
衆生故菩薩分別說是種種道所謂世間道
出世間道等問曰云何菩薩住一相無相中
而分別在世間是出世間道答曰世間名但
從顛倒憶想虛誑二法生如幻如夢如轉火
輪凡夫人強以為世間是世間皆從虛妄中
來今亦虛妄本亦虛妄其實無生無作但從
內外六情六塵和合因緣生隨凡夫所著故
為說世間是世間種種邪見羅網如亂絲相
著常往來生死中如是知世間何等是出世

間道如實知世間即是出世間道所以者何
智者求世間出世間二事不可得若不可得
當知假名為世間出世間但為破世間故說
出世間世間相即是出世間更無所復有所
以者何世間相不可得是世間出世間相常
空世間法定相不可得故如是行者不得世
間亦不著出世間若不得世間亦不著出世
間愛慢破故不共世間諍何以故行者久知
世間空無所有虛誑故不作憶想分別世間
名五衆五衆相假令十方諸佛求之亦不可

得無來處無住處亦無去處若不得五衆來住去相即是出世間行者爾時觀是世間出世間實不可見不見世間與出世間合亦不見出世間與世間合離世間亦不見出世間離出世間亦不見世間如是則不生二識所謂此世間出世間若捨世間不受出世間是名出世間若菩薩能如是知則能爲衆生分別世間出世間道有漏無漏一切諸道亦是入一相是名道種慧

經欲以道種慧具足一切智當習行般若波

羅蜜欲以一切智具足一切種智當習行般若波羅蜜

論問曰一切智一切種智有何差別答曰有人言無差別或時言一切智或時言一切種智有人言總相是一切智別相是一切種智因是一切智果是一切種智略說一切智廣說一切種智一切智者總破一切法中無明闇一切種智者觀種種法門破諸無明一切智譬如說四諦一切種智譬如說四諦義一切智者如說苦諦一切種智者如說八苦相

一切智者如說生苦一切種智者如說種種
衆生處處生復次一切法名眼色乃至意法
是諸阿羅漢辟支佛亦能總相知無常苦空
無我等知是十二入故名爲一切智聲聞辟
支佛尚不能盡別相知一衆生生處好醜事
業多少未來現在世亦如是何況一切衆生
如一閻浮提中金名字尚不能知何況三千
大千世界於一物中種種名字若天語若龍
語如是等種種語言名金尚不能知何況能
知金因緣生處好惡貴賤因而得福因而得

罪因而得道如是現事尚不能知何況心心
數法所謂禪定智慧等諸法佛盡知諸法總
相別相故名爲一切種智復次後品中佛自
說一切智是聲聞辟支佛事道智是諸菩薩
事一切種智是佛事聲聞辟支佛但有總一
切智無有一切種智復次聲聞辟支佛雖於
別相有分而不能盡知故總想受名佛一切
智一切種智皆是真實聲聞辟支佛但有名
字一切智譬如畫燈但有燈名無有燈用如
聲聞辟支佛若有人問難或時不能悉答不